

Larangan keras guna IPTA

Nilai: Sekretariat Timbalan-Timbalan Naib Canselor/Timbalan Rektor (Hal Ehwal Pelajar & Alumni) Institusi Pengajian Tinggi Awam (IPTA) menentang sebarang usaha pihak tertentu yang ingin menjadikan mana-mana kampus IPTA sebagai medan perhimpunan haram mereka.

Pengerusinya Prof Datuk Dr Mohamed Asin Dollah, berkata perhimpunan atau aktiviti yang hanya menjurus kepada sokongan terhadap individu atau ideologi pemimpin tertentu tidak wajar diadakan dalam kampus universiti, lebih-lebih lagi bertujuan mempengaruhi golongan muda seperti mahasiswa.

"Tidak sesuai sama sekali sekiranya pihak luar mengadakan perhimpunan dalam mana-mana kampus universiti, yang tidak berkaitan dengan peranan dan kehidupan sebagai seorang mahasiswa," katanya dalam kenyataan di sini, semalam.

Mohamed Asin yang juga Timbalan Naib Canselor (Hal Ehwal Pelajar & Alumni) Universiti Sains Islam Malaysia berkata, ini bagi menjamin mahasiswa memberi tumpuan kepada akademik, pembudayaan dan penguasaan ilmu serta pembangunan sahsiah mereka.

BERNAMA